

# CARTA UNI JEE NI TEE SAN JUAN APOSTOL

---

**Jeē jejnúhún de tēe nání Gayo**

<sup>1</sup>Máá rí cúu tēe jéhnú ndíso jníñu, te tēe ri carta yáha cuájeē nuū rō, amigo Gayo, chi manī rī jíin rō sáha jnūhun ndaā.

<sup>2</sup>Ñání manī, jícan tahu rī jeē vāha na quíhín tēcá jniñu sáha ró, jíin jēe na cóo vāha ró, nájñuhun íyó vāha ánuá rō jíin jnúhun ya.

<sup>3</sup>Yōhyo ni cusīi ni rī ná ni quecoo sava hermano te ni cacastūhún de nuū rī ndese vāha squícu ró táca jniñu ndaā, chi jíca ndaā rō. <sup>4</sup>Tuá na inga sáha jeē cusīi gā ni rī, chi manī jeē nihín rī jnūhun jeē cájica ndaā ñayuu cácuu nájñuhun sēhe ri siquī jeē ni scándíje ri i.

<sup>5</sup>Ñání manī, yōhyo vāha sáha ró jēe chindéé ñáhán ró tēcá hermano, te víhyá gā núu tēe ñuu jíca cácuu de. <sup>6</sup>Chi tēe un ní canacani de jnūhun nuū ñayuu cácandíje yāhá, ndese cúndáhú ni rō de. Te jícan rī jeē chindéé ñáhán gá rō de, núu na vé jíni ñúhún de jeē caca ga de ichi nuū quíhín de, nájñuhun nújnahan ní Yaā Dios. <sup>7</sup>Chi tēe un ní quendacoo de cájica de siquī jniñu Jesucristo. Te tú na vé cáquihín de nuū ñayuu jeē tu jíni jnūhun Yaā

Dios. <sup>8</sup>Jeē yúcuán cánuú coto yó de, chindéé ñáhán yó de jeē cánacani de jnūhun ndaā.

**Siquī jeē tú vāha sáha Diótrefes**

<sup>9</sup>Je ni tee ri iin carta nuū ñáyuu cácandíje jíñā. Te Diótrefes, tu jétáhú de jnūhun cáhán rī, siquī jeē cuní de cujéhnú máá de nuū i. <sup>10</sup>Jeē yúcuán, núu na jéé rī te cahán rī nuū de siquī jniñu sáha de, chi yōhyo sájñuhún de te cáhán de jnūhun stáhú síquī rī jíjnáhan ri. Te nasūu máá yúcuán-ni sáha de, chi suni tu jétáhú de tēcá hermano jéngoo nuū de, te jési de jeē ma cuátáhú ñáyuu nuū tēcá hermano un. Te ñayuu cájetáhú nuū hermano un, quénehen de i nuū cándutútú ñayuu cácandíje.

<sup>11</sup>Ñání manī, ma ndácu ró ñáyuu casáha jniñu néé, chi sa suhva ñayuu casáha jniñu vāha. Chi sēhe Yaā Dios cácuu ñayuu casáha jniñu vāha. Te ñayuu casáha jniñu néé, tu cájini i ndese Yaā cúu Yaā Dios.

**Jeē cácahán i jeē vāha  
sáha Demetrio**

<sup>12</sup>Tāca ñáyuu chi cácahán i jeē vāha sáha Demetrio. Te jniñu ndaā

jeē sāha de, stéén jeē téé ndaā cúu de. Te suni súcuan cácahān maá rí, te cájini rō jeē iyó ndáā jnūhun cáhān rī.

**Jnūhun sandīhí**

<sup>13</sup>Iyó cuéhē gā jnūhun cahān rī jín ró, te tu cúní rī tee ri jín

tinta jín pluma. <sup>14</sup>Chi nūhun ni rī cuajeē yachī rī coto jnáhan yó, te ndajnūhun yó.

<sup>15</sup>Te nūhun ni rī jeē na cóo ndeyí coo sī ni rō. Tācá amigo yō yāha cácahān i jeē sándeyí ni rō. Te suni cahān rō jín ĩn ĩn amigo jīñā jeē sándeyí ni i, áchí rí, te cocahān yō.